

Sper ina fossa

(Corr.) Gliendisdis vargau han nos convischins de Tujetsch cumpignau alla fossa la bara d'in brav juven e vischin, gerau Giusep Deflorin. Cun encarschiadetgna dedichein nus al defunct, che ha bandunau nus aschi nunspetgadamein, quellas duas lingias d'amicabla regurdientscha.

Tgi che passa tras la Val Tujetsch vesa a Camischollas sper il stradun la casa rasada della posta, la casa paterna dil defunct, nua ch' el ha passentau el rauvugl d' ina exemplarica famiglia sia affonza e ses giuvens onns. Urar e luvrar ei stada adina la norma della veta en sia casa. Dasperas haveva nies amitg égl e senn per tuts buns progress ed uneva quellas qualitads cun in spért amicabel e ruschaneivel ed in fin sentiment per quei ch'ei gest e dueivel.

Strusch curontadus onns ha il Segner dau ad el. En casa paterna, nua ch' el era sco in secund bab de casa, pils ses, fa el ina gronda largia. Mo era la visch-naunca de s. Vigeli resenta vivamein la sperdita de siu convischin che veva cun tutta raschun il num d' in bien, gest e conscienuis suprastont. Ses amitgs dil cant e della musica han dau al car defunct in commuentont comiau sur fossa, seregurdond de tontas bialas uras, passentadas en la compagnia adina buna de lur camerat.

Memia baul has Ti bandunau ils Tes, tartgein e schein nus, mirond sils onns e sin quei che nus vein piars. Mo las vias dil Segner ein bñca las nossas. Sermettend a Sia sontga voluntad veglien tuts ils ses, ils amitgs, vischins e camerats, anflar il confiert che nus vein dall' empermischun dil Segner d'in bien e perpeten seveser. R. I. P.